

Comissão de Saúde, Segurança Social e Igualdade de Género

Relatório visita fiscalizasaun ba Munisípiu Ainaro

I. **Introdusaun**

Comissão de Saúde, Segurança Social e Igualdade de Género hala'o vizita fiscalizasaun bazeia ba art. 92, art. 95, n.º 3 alínea e), kombinadu ho art. 145 n.º 3) husi Konstituisaun RDTL, no mos bazeia ba art. 35 alínea c), art. 79 alínea f) husi Rejimentu Parlamentu Nasionál.

Vizita ne'e realiza tuir deliberaun Komisaun iha loron 04 juñu 2020, no hetan autorizasaun husi Prezidente Parlamentu Nasionál datada 09 juñu 2020, hodi realiza vizita de fiscalizasaun ba Munisípiu Ainaro, inisia iha 17 to'o 20 juñu 2020.

II. **Objetivu**

Objetivu husi fiscalizasaun ne'e mak atu observa, rekolla informasaun relasiona ho servisu Administrasaun Públika, Medida prevensaun Covid-19, Ezekusaun orsamentu DOT 2020 inklui programas iha liña ministerial sira-ne'ebé tutela iha área juridisau Komisaun F.

III. **Area tematika Komisaun**

Konforme iha aneksu I, Deliberaun Parlamentu Nasionál nú. 2/2018, 27 juñu, hodi konstitui Comissões Especializadas Permanentes no defini área kompetensia ba Komisaun F:

- a) Saúde;
- b) Seguransa Sosiál;
- c) Labarik sira, terseira idade no sidadaun portadores de defisiensia;
- d) Kombatentes luta ba libertasaun nasional;

e) Igualdade Jéneru no la diskriminasaun.

IV. Kompozisaun Delegasaun

Membrus Komisaun sira-ne'ebé kompoin iha vizita traballu ida ne'e kompostu husi:

1. Dep. Noé da Silva Ximenes "Buka Tuir" (Prezidente)
2. Dep. Felix da Costa (Vise-Prezidente)
3. Dep. Helena Martins Belo (Sekretária)
4. Dep. Lusia Taeki (Membru)
5. Dep. Maria Gorumali Barreto (Membru)
6. Dep. Cidalia Mesquita Ximenes (Membru)
7. Dep. Veneranda Lemos (Membru)
8. Dep. Antonio Maria Nobre Amaral Tilman (Membru)
9. Dep. Ernesto Fernandes "DUDU" (Membru)
10. Teknika Komisaun nain 3
11. Jornalista PN 2
12. Jornalista GMN 2

V. Atividades Realizadas

1. Vizita Hospitál Referál Maubisse

Iha vizita ne'e, Prezidente no Membrus Komisaun hala'o enkontru ho Dirijentes husi Hospitál Referál Maubisse hodi relata assuntu sira hanesan tuir mai ne'e:

Rekursu Humanus

- Hospitál Referál Maubisse iha Diretor ezekutiva 1, Diretor Servisu nain 3, Xefe Departamentu nain 7 no Xefe Gabinete nain 1. Ho total ema nain 12 mak assumi kargu dirigentes no xefias. Funsionáriu Permanente iha 103 no kontratadu iha nain 5. Rekursu humanus geralmente iha Hospitál Referál: Medikus geral 14, husi sira-ne'e inklui ona ho Diretora Ezekutiva, Diretor Klinika no iha balun assumi kargu hanesan Xefe Departamentu. Enfermeiru hamutuk 27, Parteira iha 13, Laboratoriu iha ema nain 8 no Farmásia nain 5. Sura hamutuk ho tekniku aliadus total funsionáriu iha 103, husi total ne'e nain 13 iha Rejime jerál no 90 mak iha Rejime Espesiál.
- Apoiu Rekursu Umanu. Hospitál Referál hetan apoiu husi Brigada Cuba, hamutuk ema nain 10. Iha Medikus especialista nain 4 maibe agora dadun iha deit nain 2. Lolos ne'e

Hospitál Referál tenke iha Espesialista nain 4 hanesan: Obstetrísia, Pediatria, Serolojia no Medicina Jéral. Agora daudauk ida ne'ebé iha mak Espesialista Medicina Jéral no Serolojia.

Dezempeñu ka progresu sira ne'ebé mak Hospitál Referál Maubisse.

Iha inisiu Primeiru trimestre 2020, liu-liu liga ho moras Covid-19 vizitantes no pasiente iha Hospitál menus. Tanba comunidade sira tauk ho moras Covid-19, maibe atendimentu hotu lao ho normal no Pessoal Saúde sira servisu durante 24 oras.

Servisu administrasaun mos lao normal tuir orariu ne'ebé estabesidu. Funsionáriu sira-ne'ebé mak atu hetan lisensa anual Superior Hierarkiku la autoriza tanba presiza apoio pessoal sira nian hasoru Pandemia Covid-19.

Moras ne'ebé a'as liu iha Hospitál Referál Maubisse mak moras respiratóriu no tuberkulose. BOR (bed off rate) ka *rata-rata* pasiente sira baixa iha 79. Familia ne'ebé mai vizita lora-lora ka OPD (Outpatient Department) ka konsulta jerál pelu-menus lora ida bele to'o ema 70.

Problema hirak ne'ebé mak Diretor sira enfrenta maka: menus rekursu umanu liu-liu Mediku, Enfermeira, Parteira no Farmasista. Mediku iha 14, nain 4 mak assumi ona kargu. Hela deit Mediku 10 mak disponivel halo atendimentu direta ba pasiente sira.

Ekipamentus

Relasiona ho ekipamentus, Servisu Laboratóriu la'o ho diak maibe pessoal saúde sira labele halo (pemeriksaan kimia darah/ Vitrus), tanba makina a'at. Aleinde ne'e difikulta mos exame refere nian eezultadu ne'ebé tarde.

Husi Laboratoriu kontrata tékniku 1 husi India hodi hadia makina Vitrus, maibe la konsege hadia no avaria hela to'o agora. Hato'o ona pedidu ba Ministeriu Saúde atu sosa fali makina foun no tuir informasaun prosesu kompra sei hala'o hela.

Ekipamentus sira ne'ebé mak suporta iha Laboratóriu hanesan mind-Ray, agora dau-daun funsiona hela.

Makina X-Ray, maibe makina ne'e kiik los. Nia estándar lolos ne'e lora ida atende deit ema nain 5, maibe dala ruma bele hasai raan ba ema 10 to'o 15 no iha dezde 2007 to'o agora.

Makina Tuberkulose. Hetan apoiu husi Fundu Global kona-ba Programa Tuberkulose, makina refere funsiona ho diak.

Makina Anastezia. Makina ida ne'e iha dezde 2007, hodi hala'o ona servisu iha tinan barak nia laran. Iha 2019 avaria tiha, halo proposta haruka ba Ministériu Saúde hodi halo reparasaun no uza durante fulan 2 depois avaria fali. Iha Kompañia mai verifika katak iha nia tubu ida mak prezisa troka maibe to'o agora seidak, mezm ke nune'e, makina refere sei funsiona.

Orsamentu DOT

Husi Janeiru 2020 to'o agora utiliza deit orsamentu DOT. Bazeia ba Planu, mensalmente alokasaun iha \$3.000, maibe to'o agora seidak hetan orsamentu kona-ba Duodesimo nian.

Orsamentu Covid-19. Montante husi fundu Covid-19 ne'ebé alokadu ba Hospitál Regional Maubisse ho montante \$1,500. Orsamentu ne'e atu sosa deit materiais limpeza no orsamentu refere ezejuta ona 100%.

Servisu limpeza. Iha Hospitál Referál Maubisse iha Kompañia 3, hare ba Katering Kompañia SARA, Seguransa mak Kompañia GARDAMOR no Limpeza mak Kompañia ASMATETE.

Inisiu fulan dezembru 2019 to'o agora, Kompañia Asmatete abandona nia servisu iha Hospitál no la konsege hala'o pagamentu saláriu ba traballador 35 husi Dezembru 2019 to'o juñu 2020.

Agora dadauk iha Kompañia ida ho naran DUBALAI mak hetan fali kontratu foun husi Ministériu Saúde no hapara tiha Kompañia ASMATETE. Representante husi Trabalhador husu ba Komisaun no Ministériu atu solusiona problema ne'ebé sira enfrenta, no rekompensa sira-nia saláriu husi Kompañia ASMATETE.

2. Vizita observasaun ba Diresaun Klinika

Diretur Klinika hato'o informasaun kona-ba servisu Klinika ba Prezidente no Membrus Komisaun ba assuntu hirak tuir mai:

- Iha Ambulánsia 2, no KOICA apoiu ambulánsia 1 maibe ambulánsia 2 ne'ebé mak iha antes ne'e 1 a'at tiha ona.
- Servisu Ambulánsia. Tuir lolos Ambulánsia sira-ne'e uza deit ba Hospitál Referál Maubisse hodi tula pasiente ba Dili. Maibe realidade, utiliza hodi transporta ema moras iha suku sira. No manutensaun kareta ambulánsia konsentradu iha Nasionál.
- Durante Estadu Emerjénsa, Diretur ho Pessoal Saúde balu ba partisipa treinamentu kona-ba Covid-19 iha Dili, no estabelese triazen no agora daudaun lao hela.
- Liga ho orsamentu ba Pessoal Saúde ho Covid-19, iha klasifikasaun oi-oin: Liña Frente, Segunda liña, nsst. Dadus ba Pessoal Saúde haruka ona ba Ministériu, maibe to'o agora

seidauk simu subsidiu refere. Total Pessoal Saúde iha Hospitál Referál Maubisse tama iha Segunda Liña hamutuk nain 35.

- Ministériu Saúde mos seidauk fó sai total orsamentu Covid-19 ne'ebé alokadu ba Hospitál Referál Maubisse.
- Hospitál Referál Maubisse, iha mos suspeitu covid-19 nain 1 maibe rezultadu teste laboratóriu hatudu negativu. Mezmu iha suspeitu maibe Pessoal Saúde sira la tama iha categoria Liña Frente, ho razaun katak laiha fatin izolamentu.

3. Vizita Sala Rejistu

Passoal Saúde ne'ebé servisu relata ba Komisaun katak total pasiente ne'ebé mak halo konsulta iha loron Segunda no Kinta-feira bele to'o 100, no loron bai-bain menus.

4. Vizita Farmasia

Komisaun kontinua hala'o vizita observaun ba Sala Farmasia. Iha fatin ne'e atende pasiente moras jeral no espesifiku. Durante loron ida nia, grafikamente hatudu númeru a'as maka infiksaun moras respiratóriu.

Difikuldades ne'ebé Farmasista sira enfrenta hanesan:

- Fatin Farmasia ninia espasu kiik/klot;
- Espasu Armazen aimoruk kiik/klot.

Farmasista esklarese katak atu garante qualidade aimoruk ne'ebé mak diak, presiza fatin ne'ebé mak adekuaadu. Hospitál Referál Maubisse laiha armazen aimoiruk ne'ebé mak apropiadu no armazén ne'e konstrui dezde 2007, no to'o agora seidauk hetan rehabilitasaun.

Ami iha inisitiava rasik buka meius oinsa atu bele utiliza osan husi rubrika manutensaun hodi sosa material ba didin Armazen. Tanba Servisu Hospitál Referál Maubisse laiha orsamentu ba kategoria Kapital Dezenvolvimentu.

5. Vizita Banco de Sangue

Tuir informasaun ne'ebé hato'o Pessoal Saúde ba Komisaun katak iha fatin *Banco de Sangue* loron ida bele atende pasiente to'o ema nain 3, maibe reajente mak laiha ba makina reajente ba *darah lengkap* nian.

6. Vizita Laboratoriu

Durante vizita Xefe Laboratóriu presta informasaun ba Membrus Komisaun katak atendimentu iha Laboratóriu ba paciente OPD ga konsulta jéral, emerjénsia no maternidade.

Wainhira makina reajente iha atendimentu paciente loron ida ema nain 30 resin, inklui mos makina koko Sputum/ **Gin Xpert** no Tuberkulose. Makina hirak ne'e diak hotu, maibe makina **Vitrus** a'at no wainhira hasai raan tenki lori ba Dili para bele halo teste ho durasaun tempu 24 oras hodi haruka mai fali Hospitál Referál Maubisse.

Kuandu reajente hotu husi Laboratoriu haruka pedidu ba Hospitál Nacional Guido Valadares (HNGV). Pedidu normal ho durasaun tarde liu semana tolu no pedidu emerjénsia bele to'o kedas. Maibe Makina MindRay (makina hasai ran kumpletu) laiha.

7. Vizita Armazen Aimoruk

Iha vizita observasaun ne'e, responsável Armazen relata ba Membrus Komisaun katak espasu iha Armazen la suficiente hodi konserva aimoruk no seidauk hetan rehabilitasaun no alargamentu. Kuantidade aimoruk ne'ebé mak iha ho total 283 item, *stock out* iha 9.6% kompostu husi aimoruk vital, esensiál no nesesáriu.

8. Vizita Klinika Maternidade Hautio (Aituto)

Prezidente Komisaun ho Komitiva kontinua hala'o vizita fiskalizasaun ba Klinika Aituto, Munisípiu Ainaro. Objektivu husi vizita ne'e hodi observa direktamente kondisaun no prestasaun servisu iha Klinika refere. Iha vizita ne'e Pessoal Saúde relata ba Komisaun katak Rekursu Umanu ne'ebé destaka iha nain 4 kompostu husi Mediku 1, Parteira 2, Pessoal Limpeza 1 no Seguransa 1.

9. Enkontru ho Administrador Munisipiu Ainaro

Iha enkontru Administrasaun Munisipiu, Administrador relata ba assuntu ba Komisaun hanesan tuir mai:

- Servisu administrasaun munisipal tuir organograma iha Diresaun 5 no Konsellu Veternus. Administrasaun Munisipiu iha 2016, depois simu servisu deskonsentrasaun husi Governu Sentrá (Ministeriu Administrasaun Estatal hodi delega kompetensia ba Diresaun liña Ministeriais sira ne'ebé destaka mai iha Munisipiu. DL no. 3/2018 no hetan revogasaun husi VII Governu ho no. DL no. 8/2019, no agora la hatene ninia prosesu sei lao ka lae? Tanba iha tan ona mudansas politikas iha VIII Governu.

- Hare ba Planu sira hanesan Planu de Dezenvolvimentu Integradu Munisipal. Planu ne'e inklui kedas Diresoens (9) ne'ebé destaku husi Governu Sentral mai ho ninia Programa. (Edukasaun, Saúde, Agrikultura, Meiu Ambiente, nsst).
- Administrasaun. Iha organograma ida ne'ebé engloba Diresaun sira no bele hala'o servisu ida hanaran Servisu Desentralizasaun integradu bazeia ba Dekretu Lei ne'ebé mak iha.
- Rekrutamentu. Hahú kedas 2016 até 2020, Servisu Administrasaun Munisipal la konsege hala'o rekrutamentu hodi prienxe mapa pessoal tuir Organograma Servisu Administrasaun ninian. Objetivu fundamental hodi dudu prosesu desentralizasaun ba to'o rohan. Mapeamentu pessoal sira ne'e prepara ona no hein submisaun ba iha Ministru kompetente hodi ajusta iha Orsamentu.
- Servisu MSSI, em termus de koperasaun hare ba servisu deskonsentrasaun MSSI iha servisu 2 kompostu husi servisu Sosiais no Dezastre Naturais. Uluk 2019 servisu 2 ne'e tutela iha MSSI no 2020 desentraliza tiha ba Munisipiu Ainaro. Iha servisu balun mak Governu Sentral seidak desentraliza mai Munisipiu.
- Diresaun Saúde. Iha parte Saúde desentraliza deit mak Servisu Katering no Kombustivel, no apoiu Materias eskritórius inklui alokasaun orsamentu sentraliza ona iha Servisu Administrasaun Munisipal.
- DOT hahu husi Janeiru to'o juñu 2020 iha \$1.382.466. Liga ho prosesu Ezekusaun Orsamentu, kada Diresaun sei hato'o pedidu ba Administrador hodi hetan aprovasaun.
- Orsamentu \$9.000 ba manutensaun la ezejuta tanba prosesu aprovisionamentu. Ho montante ne'ebé kiik ne'e Kompañia sira la kohi konkore no ikus mai halo tranferansia hodi finansia atividade seluk.
- Infraestrutura. Kona-ba konstrusaun kada liña ministeriais ne'ebé dezkonsentra iha Munisipiu. Administrasaun Munisipal mak prepara ninia deseñu no BOQ inklui akompañamentu ba prosesu finaliza kontrusaun.
- Diresaun Edukasaun no sira-seluk destaka hotu ona mai iha Munisipiu maibé seidak iha Rekursu Umana ne'ebé suficiente hodi hala'o servisu.
- Sentru Saúde Munisipal. Dala ruma Ministru mai sempre kestiona tanba sa mak fornese aimoruk ladun diak? Ema moras ain deit mos tenki haruka ba Hospitál Nasional? Haruka ba Hospitál Referál?
- Dezafiu: Hare ba assuntu sosiál nian ne'eb'e kabe to'o ba iha Ministériu, bele dehan katak MSSI ne'e dapur nasaun nian. Mas dala barak ladun kobre povu nia hakarak no halerik iha Munisipiu. Dala barak rekolla ona dadus kona-ba apoiu aihan maibe ami labele responde. Tanba, dala ruma planu MSSI nian ladun aloka osan barak iha ne'eba, hahu

dezde uluk to'o agora. **Hanoin, liu husi sorumutu ida ne'e, Exelensias sira bele koalía iha Parlamentu no Ministériu kompetente atu planeia no aloka orsamentu.**

- Saúde. Assuntu ida-ne'e mais importante, tanba Ita nia povu TL la asesu ba saúde diak, ne'e susar oituan. Kuandu ita koalía kona-ba progresu dezenvolvimentu ekonomiku no sira seluk tenki liga ho saúde.
- **Assuntu Igualdade Jéneru.** Durante ne'e tuir observasaun, mezmu ke seidak desentraliza programa sira-seluk direta mai iha Munisipiu, mas em termus de koperasaun, Administrasaun Munisipál aloka fatin ba Pontu Fokal hodi hala'o nafatin servisu.
- Iha organizasaun barak mak sei fó apoiu hodi halo formasaun hanesan husi UNDP. Alein de formasaun, Pontu Fokal mak iha koñesimentu barak liu ba regras no Diplomas sira seluk ne'ebé regula asuntu Igualdade Jéneru. (Lei Protesaun Labarik, Lei Violénsia Domestika, Trábalu Infantil, nsst).
- **Dezafiu mak ne'e, Pontu Fokal mesak deit. Bainhira nia iha impedimentu ne'e difikulta servisu tanba laiha substitui. Iha mos hanoin ida katak, bele hamosu ona Servisu Igualdade Jéneru ne'e atu sai hanesan Diresaun ida hodi bele hala'o knar ho diak.**
- Assuntu Veteranus. Servisu Administrasaun Munisipiu no Kosellu Veteranus iha koordinasaun diak ba servisu. Agora dadauk Veteranus sira harí ona assosiasaun ida ho naran "Veteranu Ainaro" hodi partisipa iha dezenvolvimentu ekonomia. (sira iha ona estasaun kombustivel no Loja ba materiál kontrusaun). Iha futuru Assosiasaun ne'e sei loke Banku kreditu, Loke Mini Market no fó kreditu ba Komunidade Ainaro.
- Pagamentu Subsidiu. Tuir lista agregadu familiar ne'ebé Administrasaun Munisipiu haruka ba Estatal no MSSSI ho total 16.655 Xefe Familia no lista aprovado husi MSSSI iha 16.501, Sira ne'ebé halo pagamentu ona iha 8.062 no sira-ne'ebé mak seidak simu subsidiu iha 629 (dadus provisoriu). Iha 90 Xefe família hato'o reklamasan.

Prezidente Konsellu Veteranus:

Iha sorumutu ho Prezidente no Membrus Komisaun F Prezidente Konsellu Veteranus informa katak:

- Ami Veteranu Ainaro husu ba Nai Deputadu sira no Governu atu hari Komisaun Nasionál ida ba Veternau ninia oan sira. Ho objetivu oinsa mak sira nia oan bele hetan bolsu estudu no direitu sira-seluk.

- Konsellu Veteranu ninia programa maka oinsa mak Veteranu sira bele hetan asesu ba tratamentu saúde. Tanba barak hetan moras iha foho tenki ba halo tratamentu iha Díli. Se bele karik koalia ho Administrador Munisipiu Ainaro atu resolve assuntu saúde nian iha Munisipiu, hodi evita deslokasaun ba tratamentu saúde iha Díli. Ami Koloka assuntu ne'e, tanba Mediku sira halo tratamentu saúde ba Veteranus hanesan deit ho ema bai-bain.
- Se bele iha fatin ketak ida ba Veteranu atu halo tratamentu saúde.
- Alokasaun fundu ba selebrasaun loron importantes hanesan dia 3 de marsu, 20 de agostu, diak liu alokasaun orsamentu ba eventua sira-ne'e direta mai iha Konsellu Veteranu hodi ezekeuta rasik. Tanba ami mak hatene programa sira-ne'e. Se aloka fali ba iha Administrasaun Munisipiu ne'e ladun diak karik.
- Husu atu aprova Diploma Ministerial ruma kona-ba farda (uniforme) ba Veteranus hodi uza iha selebrasaun loron historiku sira. Kuandu farda la iha entaun ami labele kontrola Veteranu sira no la halo diferensa veteranu ho Entidade sira-seluk.
- Konsellu Veteranu Ainaro iha ona Planu hodi kria uniforme, maibe ami husu ba Nai Deputadu sira atu kria uluk diploma ida hodi regulariza.
- Husu ba Nai Deputadu sira, iha Lei ACLN nian katak ema ne'ebé simu osan 4 a 7 simu ona subsidu no sei laiha direitu tan. Iha balun hetan dedikasaun 0 a 3. Tuir ami nia hare, ne'e hanesan diskriminasaun bo'ot ida. 12 novembru, loron ida deit ita bele konsidera ba 8 -14. Mas Inan-aman sira ne'ebé mak uluk iha baze de apoiu hetan fali 0 a 3, se lae hetan 4 a 7. Oinsa Nai Deputadu sira nia hare kona-ba assuntu ne'e.
- Husu ba Deputadu sira, Governu iha ona hanoin ruma atu aloka netik fundu ruma ba sira ne'ebé hetan dedikasaun 0 a 3 no 4 a 7? Sei laiha alokasaun orsamentu oinsa mak sira bele haruka oan sira ba eskola?
- Kona-ba Assosiasaun Veteranus Munisipiu Ainaro iha ona orsamentu 300 mil resin ho Membru iha 1.031 pessoas. Ho osan ne'ebé mak iha loke Estasaun Kombustivel 1 no Loja konstrusaun 1.
- Assosaisaun nia Planu ba oin mak prontu ajuda Veteranus ne'ebé maka hakarak halo uma liu husi fó kreditu material konstrusaun ba sira.
- Kontribuisaun osan ba assosiasaun sei to'o deit tinan 2, tanba Ministeriu mos halo kortes ba pensaun \$30 kada fulan.

Diretur Sentru Saúde

- Iha 23 de marsu 2020, Administrador hamutuk ho equipa liña Ministerial nivel Munisipiu halo koordinasaun kona-ba prevensaun pandemia Covid-19, hodi estabeselese equipa ida

ho naran *Taskforce*. Ekipa ne'e lidera rasik husi Administrador ho nia sekretáriu Komandante PNTL Munisipiu.

- Laiha alokasaun orsamentu ba Munisipiu hodi kobre atividades sira ne'ebe liga ho pandemia Covid-19, maibe atividade ba prevensaun lao nafatin.
- Fatin karantina iha ema nain 4, no kumpri tiha prazu obrigatóriu no sertifika katak sira la iha sintoma no reintegra ona ba família. Iha ema nain 8 mak auto karantina ho nia rezultadu diak no laiha sintoma. Simu mos sira ne'ebé kumpri kuarantena obrigatóriu husi Díli 48 pessoas no fila ona ba família.
- Husu ba Ministériu competente atu aloka orsamentu mai Munisipiu hodi realiza atividade prevensaun Pandemia Covid-19 iha II período karik iha.
- Husu ba Nai Deputadu sira hola desizaun no reforsa kontrolu ba Entidades sira ne'ebé responsável ba Fronteira terrestre no Maritima hodi halo vijilánsia ba entrada no saída maluk estranjeiru sira.
- Orsamentu 2019 ne'ebé Sentru Saúde simu em *cash* \$29.424.3. lolos kada trimestre ne'e hetan \$13 mil. Orsamentu ne'e hodi implementa Programas saúde sira.
- Kombustivel. Sentru Saúde hetan difikuldades kona-ba apoiu kombustivel hodi realiza programa Saúde inklui servisu ba prevensaun pandemia Covid-19.

Diretora MSSI Munisipiu Ainaro

- Progresu servisu MSSI munisipiu sempre halo kordenasaun hamutuk ho Autoridade Lokál sira hahu husi Xefe Aldeia, Suco, no Administrador Postu no Parseiru sira hodi atende Komunidade.
- Programa rua mak desentraliza iha Munisipiu Ainaro kompostu husi Programa Sosiál no Dezastre Naturais.
- Dezafiu ne'ebé mak MSSI Munisipiu enfrenta maka seidak iha Edifisiu, Armazen no Uma tranzitu ka Uma Mahon. Fatin ne'ebé Diresaun hala'o servisu la sufisiente hodi atende Komunidade sira.
- Assistensia Umanitária. Parte Diresaun hato'o ona lista apoiu Umanitária husi Komunidade maibé seidak hetan resposta husi Nasionál.
- Husi Ministériu Solidadriede Social no Inklusaun durante tinan 4 ona seidak halo manutensaun ba motorizada sira ne'ebé tékniku sira uza hodi hala'o servisu iha Munisipiu Ainaro.
- Laiha funsionáriu hodi hala'o servisu iha programa assistensia sosiál no Dezastre naturais.

Pontu Fokál Sekretária Estadu Igualdade no Inkluzau

- Kna'ar Pontu Fokál SEII maka hala'o promosaun kona-ba asuntu Igualdade Jéneru no organiza selebrasaun loron feto nian.
- Difikuldade ne'ebé hasoru mak **orsamentu** no **Rekursu Umanu** hodi realiza atividade ka programa ne'ebé iha Munisipiu.
- Apoiu kombustivel. Iha Munipiu SEII enfrenta difikuldade kona-ba apoiu kombustivel hodi hala'o servisu.
- Laiha Edifisiu propriu ba SEII atu halao servisu, agora dadaun akumulala hela iha Servisu Administrasaun Munisipiu.
- Assosiasaun Feto. Laiha edifisiu ba Assosiasaun feto hodi hala'o sira nia knar.
- Laiha fatin ba vitíma sira wainhira atu halo keixa ba Polisia Unidade Vulneravel.

10. Vizita Postu Saúde Casa

Komisaun F Parlamentu Nasionál kontinua hala'o vizita ba Postu Saúde Casa, Postu Administrativu Ainaro, Munisipiu Ainaro. Iha vizita ne'e Membrus Komisaun hala'o observasaun ba servisu administrasaun no atendumtu inklui observa mos facilidade saúde iha Postu refere.

Pesoal Saúde relata ba Komisaun assuntu sira-ne'ebé hanesan tuir mai:

- Profissionais Saúde ne'ebé destakadu iha Postu Saúde kompostu husi Mediku 1, Farmasista 1, Enfermeiru 1 no Pessoal limpeza nain 1.
- Moras ne'ebé a'as liu iha Suku Casa maka TB no reprezenta Primeiru lugar iha Munisipiu Ainaro no tuir fali mak moras ISPA.
- Facilidade Saúde. Postu Saúde iha Oxijénio 1 maibe nia masker maka a'at, sala Maternidade laiha kurtina no laiha facilidade fase liman.
- Laiha stok suplementu ai-han ne'ebe ho Vitamina.
- Laiha stock out kona-ba aimoruk
- Konsulta moras. Iha tempu Estadu Emerjénsia Komuidade sira ne'ebé mai konsulta ho número ne'ebé menus tebes kompara ho situasaun antes implementa Estadu Emerjénsia.
- Inan Partus. Dala barak Inan barak mak partus deit iha Uma no hetan akompañamentu husi Pessoal Saúde sira.

VI. Konklusaun

Konklui tiha enkontru ho Administrador Munisipiu inklui responsável husi liña ministeriál Komisaun halo konklusaun hanesan tuir mai ne'e:

1. Preparasaun husi Autoridade Lokál no Pessoal Servisu Saúde nível Munisipiu no Parseiru sira kona-ba prevensaun Pandemia Covid-19 lao ho susesu mezmú enfrenta difikuldades oin-oin. Atividades sira ne'ebé hala'o maka halo sensibilizasaun ba Komuidade kona-ba medidas prevensaun ne'ebé estabese iha Estadu Emerjénsia inklui fahe brosurá medidas prevensaun husi Organizasaun Mundiál Saúde - OMS.
2. Rekursu Umanu. Bazeia ba observasaun Komisaun nian hatudu katak iha Servisu Saúde, Servisu Administrasaun Munisipiu, Liña Ministeriál relevantes sei prezisa tan apoiu pessoal hodi reforsa servisu iha Munisipiu.
3. Ministériu Saúde la prevê orsamentu iha Katégoria Kapital Dezenvolvimentu hodi fasilita rehabilitasaun Armazen Aimoruk iha Hospitál Referral, no Responsavel sira utiliza fali orsamentu husi Bens no Servisu iha rubrika manutensaun Ekipamentus e Edifisius.
4. Ministériu Saúde no Servisu Saúde Munisipal seidak hala'o manutensaun rutina ba transporte hanesan Motorizadas, Ambuláncias hodi apoiu servisu no implemientasaun Programa Saúde iha nível Munisipiu.
5. Ekipamentus Medikus. Ministériu Saúde no Servisu Saúde Munisipal seidak tau atensaun no halo monitorizasaun no levantamento dados ba Ekipamentus Medikus iha Hospitál, Sentru no Postu Saúde ne'ebé sei falta no sira-ne'ebé hetan avaria.
6. Trabalhador Limpeza Hospitál Referál Maubisse. Bazeia ba observasaun no keixa hatudu katak iha Trabalhador ne'ebé presta servisu iha Hospitál Referál Maubisse, Kompañia Asmatete la kumpri nia dever hodi selu trabalhador sira nia saláriu, husi dezembru 2019 to'o juñu 2020.
7. Armazen Medikamentus. Bazeia ba informasaun no Komisaun ninia observasaun hatudu katak armazen aimoruk ne'ebé konstrui iha 2017, nia espasu la suficiente hodi konserva aimoruk no seidak halo rehabilitasaun to'o agora.
8. Bazeia ba informasaun no Komisaun ninia observasaun hatudu katak seidak iha Edifisiu própriu, armazen MSS, no Uma Mahon ba Servisu Sentru Solidariedade Sosiál no Servisu Igualdade no Inklusaun.
9. Ministériu Solidariedade Sosiál no Inklusaun seidak hala'o manutensaun ba transporte hanesan Motorizadas iha Munisipiu Ainaro.

VII. Rekomendasaun

Ministeriu Saude

1. Husu ba Ministériu atu propoin iha Orsamentu 2021, kona-ba konstrusaun Armazen Medikamentus iha Hospitál Referál Maubisse, Munisipiu Ainaro.
2. Rekomenda ba Ministériu hodi identifika no propoin Rekursus Humanus iha Hospitál, Sentru no Postu Saúde hodi reforsa prestasaun servisu iha Munisípiu no área remotas.
3. Rekomenda ba Ministériu atu garante manutensaun regular no apoiu kombustivel ba Transporte (Motorizadas no kareta Ambuláncias) hodi apoiu servisu no implementasaun programa saúde iha Munisípiu.
4. Rekomenda ba Ministériu atu assegura no garante Ekipamentus Mediku iha Hospitál, Sentru no Postu Saúde sira.
5. Rekomenda ba Ministériu atu hari'i sentru izolamentu ba Pasiante ne'ebe sofre moras TB no hala'o programa ba redusaun moras Tuberkulose -TB.

Ministeriu Assuntu Antigos Kombatientes Libertasaun Nasional

1. Rekomenda ba Ministeriu atu fó atensaun konaba assuntu bolsu estudu liu-liu ba Martires sira nian oan.
2. Rekomenda ba Ministeriu Antigos Kombatientes Libertasaun Nasional no Ministeriu Saúde atu fó atensaun ba tratamentu saúde veteranus iha Munisipiu.

Ministeriu Solidariedade Sosial no Inklusaun

1. Rekomenda ba Ministeriu atu konstrui Armazen no uma Mahon ba vitima sira iha Munisipiu Ainaro.
2. Husu ba Ministeriu atu halo atualizasaun dados ba idosos, bolsa da mãe, ema ho difisiénsia no lista ba kbiit laek sira.

Rekomendasaun Jeral:

1. Rekomenda ba Ministériu Solidariedade Sosiál, Ministériu Estatal, no Sekretaria Estadu Iguladade no Inklusaun atu aumenta funsionáriu iha Munisipiu hodi reforsa servisu liña ministériu ida-ida conforme prevé iha Dekretu Lei Desentralizasaun.
2. Rekomenda ba Ministériu atu garante manutensaun regular no apoiu kombustivel ba Transporte (Motorizadas no kareta) hodi apoiu servisu no implementasaun programas liña ministerias iha Munisipiu Ainaro.

VIII. Aprovasaun Relatóriu

Relatóriu vizita ne'e hetan apresiasaun no aprovasaun iha sede Komisaun loron 7 janeiru 2021, ho votus a favor 5, kontra 3 no abstenasaun 0.

Relatóra,

Prezidente Komisaun,

Helena Martins Belo

Noé da Silva Ximenes “Buka Tuir”